

NAFARROAKO SEGURTASUN PUBLIKOA. Aldaketa partziala.

FORU LEGE AURREPROIEKTUA, ekainaren 20ko 8/2006 Foru Legea, Nafarroako Segurtasun Publikoari buruzkoa, aldatzekoa

## ZIOEN AZALPENA

Nafarroako Segurtasun Publikoari buruzko ekainaren 20ko 8/2006 Foru Legeak Nafarroako segurtasun publikoaren sistema taxutzen du, Administrazio Publiko desberdinen parte-hartzeaz osatua, eta, horrekin batera, koordinazio eta plangintza tresnak diseinatzen ditu helburu nagusi batekin, ahalik eta eraginkortasun handiena lortzea alegia, eskura dauden baliabideen erabilera arrazoizkoa eta jasangarria izan dadin, eta, horrenbestez, herritarren segurtasunaren arloan nahi ditugun emaitzak lortzeko.

Arau horren II. kapituluaren aurreikusirik dago zein den Nafarroako segurtasun publikoaren sistema horren antolaketa. Kapitulu horretan arloaren antolamendu administratiboa jasotzen da, berariazko eginkizunak esleitzen zaizkie administrazio autonomikoko eta toki administrazioeko organo eskudunei, eta segurtasun publikoaren eremuko parte-hartze eta koordinazio organoak arautzen dira, hala nola Herritarren Segurtasunerako Kontseilua, Herritarren Segurtasuneko toki kontseiluak, Segurtasun Publikorako Departamentuarterako Batzordea, Nafarroako Segurtasun Batzordea, segurtasunerako toki batzordeak udaltzaingoa duten udalerrietan, eta, azkenik, Udaltzaingoa Koordinatzeko Batzordea.

Zalantzarik gabe, politika publikoetan parte hartzeko eta horiek aztertzeko bide finkoetako bat dira kide anitzeko organoak, betiere bete nahi dituzten beharretarako egokiak eta proportziozkoak badira, eta aintzat hartzen badira eman dezaketen baliagarritasuna eta balio erantsia, kasu honetan segurtasun arloko politika publikoen hobekuntzari, ekarpen horiek justifikatuko baitute organoen beraien existentzia, azken finean.

Aitzitik, eginkizun berberak dituzten organoak bikoiztu edo ugaltzeak eta antolamendurik gabeko osaketa eta funtzionamendua izateak operatibitatea kendu eta afuntzional bilaka dezakete sistema organiko hori, politika publikoei egin diezaiokeen ekarpena ezerezean utziz. Horregatik, segurtasun publikoaren sistemaz gogoeta egin, eta berrantolatu beharra dago, arrazionaltasunean eta errealismoan oinarritutako irizpideekin, antolaketaren diseinua herritarren behar eta eskaeretara eta Nafarroako Foru Komunitateko errealitatera ekarriz; horretarako, beharrezkoa da haien araudia eta operatibitatea ebaluatzea legeak ezarritako printzipioekin bat etor daitezen, kide anitzeko organoen maparen diseinu arrazional eta errealistagoa helburu, segurtasunaren arloko politika publikoari ekarpena egin diezaioten.

Egitura eta mapa organikoak berrantolatzeko ariketa orotan, lehenengo eta behin, murriztu behar da segurtasun publikoaren sisteman dauden kide anitzeko organoen kopurua, eginkizunak bikoiztuta dituztenak edo operatibitate faltagatik sistemari inolako baliorik ematen ez diotenak kenduz edo elkartuz.

Murrizketa prozesuetan beti ziurtatu behar da kide anitzeko organoari esleitutako eginkizunak ez direla premiazkoak edo, kontrakoa, mantenduko den beste organo batean daudela edo hark beregana ditzakeela. Alde horretatik, inoiz bildu ez diren Herritarren Segurtasunerako toki kontseiluek toki esparruan esleituta dituzten eginkizunak aurreikusirik daude, batetik, Segurtasuneko Toki Batzordeetan, udaltzaingoa duten udalerrien kasuan, edo, bestetik, Kontseilu Sektorialak eratuz (hauek ez daude pentsatuta soilik polizia kidego hori duten udalerrietarako), azaroaren 28ko

2568/1986 Errege Dekretuan, Toki Entitateen Antolaketaren, Funtzionamenduaren eta Araubide Juridikoaren gaineko Erregelamendua onetsi zuen horretan ezarriak; ohikoa da aipatutako bi organo horiek toki entitateetan errepikatzea.

Bestalde, Foru Komunitateko Administrazioari dagokionez, Segurtasun Publikorako Departamentuarterko Batzordearen eginkizunak errepikatzen dira Herritarren Segurtasun Kontseiluan, baina lehenaren kasuan parte-hartzearen eremu subjektiboa eta objektiboa handiagoak dira, eta hartara bideratu behar dira modu koordinatuan segurtasun publikoarekin lotutako gaiak, administrazio desberdinak ukitzen dituztenak, Nafarroako segurtasun publikoaren sistemak oinarrian dituen ikuspegitik eta printzipioetatik: osagarritasuna, lankidetzeta, koordinazioa, elkarlana, elkarrekiko informazioa eta leialtasun instituzionala.

Bigarrenik, berregituratze prozesuak helburu hau izan behar du: segurtasun publikoaren sistema hori azkenean osatu behar duten organoen errendimendua ahalik eta handiena izatea, segurtasun publikoaren arloko politikaren plangintza, ezarpena eta ebaluazioa eraginkorrek eta zuzenak izan daitezela bermatzeko. Segurtasun Publikoaren Kontseiluaren kasua da, adibidez, haren osaketa eta bertan parte hartzen duten ordezkariak organo horren jardun eremu hutsera egokitzeko asmoa dagoelako; horrela, Segurtasun Publikoaren Departamentuarterko Batzordea eta Nafarroako Segurtasun Publikoaren Behatokia iraungitzea proposatzen da, eta haiek betetzen dituzten eginkizunak batzuk Segurtasun Publikoaren Kontseiluaren esku uztea. Behatokiak zehaztuta dituen eginkizunak kontseiluari laguntza ematekoak dira, nagusiki kudeaketaren eta datuen analisiaren arloetakoak, eta horiek Administrazio Publiko desberdinen antolaketatik bertatik bete daitezke.

Aipatutako gaietako batzuk aurrera eramateko beharrezkoa da Nafarroako Segurtasun Publikoari buruzko ekainaren 20ko 8/2006 Foru Legea ukitu edo aldatzea, eta, beste gai batzuen kasuan, lege hori garatzen duten foru dekretuak, hala nola Nafarroako Foru Komunitateko Herritarren Segurtasun Kontseilua arautzen duen otsailaren 28ko 13/2011 Foru Dekretua eta Nafarroako Segurtasun Publikoaren Behatokia sortzen duen martxoaren 28ko 21/2011 Foru Dekretua.

## NAFARROAKO SEGURTASUN PUBLIKOARI BURUZKO EKAINAREN 20KO 8/2006 FORU LEGEAREN ALDAKETAREN TESTUA.

Artikulu bakarra. Nafarroako Segurtasun Publikoari buruzko ekainaren 20ko 8/2006 Foru Legearen aldaketa.

Nafarroako Segurtasun Publikoari buruzko ekainaren 20ko 8/2006 Foru Legeari aldaketa hauek egiten zaizkio:

Bat. 9. artikuluko 3. apartatuan f) letra aldatzen da, eta f) eta g) letrak eransten dira, eta egungo f) letra h) letra izanen da aurrerantzean. Hona testu berria:

“9.3 artikulua.

f) Estatistikarako interesgarriak diren informazio polizialen sistema bateratu baten kudeaketa eta mantentze lanak egitea, eta informazio polizial interesgarria Nafarroako Foruzaingoaren eta Nafarroan jarduten duten gainerako segurtasun indar eta kidegoen artean trukatzeko sustatzea.

g) Nafarroako Segurtasun Publikorako Plan Orokorra nola eta zenbateraino betetzen den zaintzea.

h) Indarra duten arauetan ezartzen zaizkion gainerako eginkizunak.”

Bi. 10. artikulua osorik kentzen da.

Hiru. 11. artikulua osorik kentzen da.

Xedapen indargabetzaile bakarra. Indargabetzeak.

Indarrik gabe gelditzen dira lege honetan xedatutakoari aurka egiten dioten lege edo erregelamendu mailako xedapen guztiak, lanbide korporazioen estatutuak eta kide anitzeko organoen gainerako barne arauak, eta, bereziki, Nafarroako Segurtasun Publikoaren Behatokia sortzen duen martxoaren 28ko 21/2011 Foru Dekretua.

Azken xedapenetan lehenbizikoa. Erregelamenduak emateko gaikuntza.

Nafarroako Gobernuari baimena ematen zaio foru lege hau garatu eta betearazteko behar diren erregelamenduzko xedapen guztiak eman ditzan.

Azken xedapenetan bigarrena. Indarra hartzea.

Lege honek Nafarroako Aldizkari Ofizialean argitaratu eta biharamunean hartuko du indarra.